



MARYMA

Ramhlun North YMA Chanchinbu

“YMA thuvawn: YMA chu tanpui ngaite tanpuitu



YMA thiltum: 1. Hunawl hman that. 2. Zofate hmasawna ngaihtuah. 3. Kristian nun dan tha ngaihsan

Vol. 44

Issue No. 14

Ramhlun North: Ni 4 April, 2026

BRANCH THU THAR

■ April thla khawharin hruaitu turte:

- Leader : Pu VL Pianruala
 Asst Leader : Pu H. Lalthazuala
 OB Incharge : Pu Lalrochama
 1. Pu R. Zonunmawia
 2. Pu Vanlalrova
 3. Pu Lalthlengliana
 4. Pu Lalhriatpuia
 5. Ni. V Lalruatkimi
 6. Ni. Laldinpuii

■ **Chawngbawla Rûn chabi leh Motor Chabi kawltu:** YMA motor leh Chawngbawla Rûn chabi kawltu thin Pu Lalneihlua chu hmun danga a insawn tak avangin motor chabi leh Chawngbawla Rûn chabi te hi BECM Pu Isaak Zothiaghlima'n kawltu tawh se tiin OB meeting a rel a, member te kan inhriattir a ni.

■ **YMA In No.5 luahtu:** YMA in No.5, Mizofed chung chu a luahtu Aizawl Two Wheeler Taxi Association ten an chhuahsan tak avangin April thla atangin Ni. Rammuanpuii, V-Sec. chuan a luah tan ang.

■ April ni 10, 2026 zanah Branch Executive Committee meeting neih a ni dawn a, member-ten hun remchang lo insiam nise.

SUB-COMMITTEE THU

■ **Library sub-committee:** Visitor of the Month, March 2026 lawmman dawng turte:

1. Phoebi Lallawmsangi- S-Sec.
2. Amos Vanlalruata- C-Sec.
3. Jedidah Laltnanmawii- C-Sec.
4. Michelle Lalngaihsaki- C-Sec.
5. Lalmuanpuii- C-Sec.
6. Remruatfeli Kiangte- K-Sec.
7. Moses Lalchhanhima- C-Sec.
8. Laldusaki Ralte- C-Sec.
9. Lalnunhlui Ralte- C-Sec.
10. Lalrinsangi Ralte- C-Sec.
11. Lalruathlui- C-Sec.
12. Naom Malsawmkimi- C-Sec.
13. Ruth Lalremruati- C-Sec.
14. Isak Malsawmtluanga- C-Sec.

■ **Library duty turte:**

1. Samuel Vanlalngaha, N-Sec.
2. PC Lalrindiki, V-Sec.
3. Lalfelfamkimi, V-Sec.
4. Lalmuanpuii, C-Sec.
5. Lalremruatkimi, K-Sec.
6. Lalhruaitluangi, T-Sec.

MARYMA ENKAWLTUTE'N INTUAITHARNA HUN HMANG

Ramhlun North, the 4th April, 2026: Ramhlun North Branch Executive Committee-n min phalsak angin ni 31.03.2026 (Thawhlehi) nileng khan Ramhlun North YMA Chanchinbu, MARYMA enkawltute chuan NextComm Resort, Luangmual-ah intuaitharna hun hlimawm tak leh hlawkthlak tak kan hmang.

He hunah hian kal kan tha thawkhat hle a, mi 30 vel zet kan thawk chhuak thei a ni. Resort nuam tak mai leh boruak thiag tak hnuaiyah hun hmasa lam chu intihhlina leh inkawm hlimna hun atana hman a ni a. Nileng deuh thaw a hlim taka hun hman a nih hnuin, tlai dar 4:00-ah intuaitharna hun tawi hman a ni.

He hun hi kan Editor, Pu Vanengmawia'n a kaihrui a, Jt. Editor-te leh Asst. Manager-te'n lawmman semna hun an hmang baw. Manager, Pu Lalremsanga Hnamte chuan kalkhawmte fuihna thu sawiin, “MARYMA hi veng chung in tin ah lut se, chutiag tur chuan MARYMA enkawltu tu mai pawh hi kan pawimawh a, kumin chhunga kan tan mar pat a ngai a ni,” tiin thahnemngai takin kalkhawmte a chah a ni.

Tlai dar 4:30-ah chawhlui kil ho a ni a, tuang tak leh hlim takin hun hman a ni. He huna kan chaw ei tur, tui tak mai a min siamsaktu Pu Emanuel Lawmkima, C-Sec. chungah lawmthu kan sawi tak meuh meuh a ni.

He kan hun hman hian MARYMA enkawltute inkara inlungualna leh thahnemngaihna thar a siam ngei kan beisei a, kumin chhunga kan hmalakna hrang hrangah, chak zawka hma kan lak theih nan he hun hi a hlu in tuang taka kan hmang thei hi a lawmawm hle.



RAMHLUN NORTH YMA CRICKET TEAM-IN PRE-QUARTER FINAL LUT

Central YMA leh Cricket Association of Mizoram tangkawp chuan April thla atang khan Inter Branch YMA Cricket Tournament a buatsaih a, Branch 52 in Tournament hi an khel mek a ni.

Central YMA Cricket hi kum 2003 atanga tan a ni a, champion hmasa ber hi Armed Veng South an ni nghe nghe. YMA team jersey te hi Ethan Go Mobile-in an min sponsor sak a, hruaitute'n an chungah lawmthu an sawi. Kan Branch hi tournament hmasa lama kan chhet that avangin seeded kan ni a, match hmasa lam kan bye hnuah ni 30 March khan Tlangnuam Branch YMA nen 3rd Batallion MAP Ground Mualpuiah inkhelin run 88 in kan chak a. Match hi 20 overs format a khelh niin kan veng YMA team te hian run 187 siamin wicket 7 an hloh a, Tlangnuam lam hian run 98 siamin an out vek thung. Ramhlun North Branch YMA tan hian Zomuanpuia s/o Lalthlamuana (S-Sec.) chuan run 61 leh wicket 3 lain team tan a thawh hlawk hle. Vengchungah kum lama la naupang zawk player tha tak tak kan kawltu chho zel a, Mizoram huap ang pawn kan hmabak a eng hle.

Kan match khelh leh tur hi Pre-Quarter final a ni tawh anga, Champhai Vengthlang nen AR Ground, Lammual ah Inrinni chhun dar 12:00 hian kan khel leh dawn a ni. He thu buatsaih lai hian result kan hre hman ta lo.



VENGINPUMKHATNA

Mizo hnam ze mawi tak leh kan hmasawna kawng tura pawimawh em em mai pakhat chu veng leh khawtlang tana inpumkhatna tura ke pen hi a ni. Mizote hi khawtlang nun ngaihsak mi kan nih avangin, kan veng aiawha tu emaw an chhuah emaw, kan veng hminga hnatlang leh thil dang a awm hian kan thawhona hian kan veng hlutna a hril thui hle thin.

Veng hming emaw YMA hminga thil tih reng reng hian kan aiawhte chauh hi a hmingchhia emaw a hmingtha an ni ngai lo va, veng pum hmingchhatna leh hmingthatna a ni tel tih hriain an hnunga tlawmngai taka thlawptu leh tawiaawmtu mipui kan awm hian, kan aiawha chhuakte khan chakna thar leh phurna thar a nei thin. Hei hi sport-ah chauh ni lovin, inelna dangah a ni emaw, hnatlan thil thuah pawh nise a dik thui hle. Inpumkhatna nena thawhho hian mimal nilovin veng leh YMA hming a ti tha zawk thin tih a lang chiang hle.

Veng khata cheng, in leh lo inhnaih tak tak, tlawmngai pawl hrang hrang leh kohhran hrang hrang awm mah ila, veng aiawha thil pawimawh a kan chhuah tawh chuan inlungualna leh thawhona tha tak nena ke kan pen hian kan veng impumkhat zia a lantir thin a, heihi thil mawi tak a ni.

Tunlai hian kan Branch YMA Cricket team te chuan Mizoram pum huap inelna Cricket Tournament an khel mek a. Inelna sang leh hautak tak a nih avangin kan players-te tan chauh chuan thil awlsam a ni lo va, kan tana an thiamna leh tha an hlan lai hian a pawn lama kan lo tawiaawmna leh kan thlawpna hian chakna thar leh phurna nasa tak a pe dawn a ni.

Chuvangin, kan Branch hming ti tha tura an beih mup mup lai hian member zawng zawngte pawhin kan thiam ang tawk tawka kan tawiaawm a, kan thlawpna kan lantir hi a pawimawh hle. Chakna hlu ber chu mipuite thlawpna a nih avangin kan aiawh a khel ten phurna leh tanrualna tha tak nei chung hlawhtlinna an chan ngei theih nan thahnemngai takin i tawiaawm thin ang u.



KHAWTHLIR

KIANG RAWH, KA CHHÂWNIN A HEM ANG CHE!

Pi leh pute hun kha kan thlir let chuan an tawngkam hman te, an nitin khawsak dan leh khawtlang nun inkaihruaina an kalpui dan te zir tham tam tak a awm awm e. A bikin tawngkam hman danah an fimkhur hle a, tawng malsawm leh mawi hman hun an hria a, chutih rualin khawtlang mipui nun siamthatna atana zilhna tawngkam erawh ngêng chhun hlak tur khawpa nâ te pawh a awm nawk bawk thin. A zavaiin sawi vek seng lo mah ila, tlangval mit tikham deuhte hnena zilhna tawngkam an hman thin zinga pakhat ilo thlur bing dawn teh ang.

Kan hriat angin Pi leh Pute nun kha buaina leh thlaphannain a khat a. Khua leh khua inrûn an chin avângin khaw kar kawng leh feh kawngah a fala kal a ralmuang lova, thlawhhma a binga neih pawh a ralmuang lo hle bawk. Chutih hunlai chuan khawtlanga hmingtha leh huaisen nih hlawn chu sa kah theih vang te, tlawmngaih vang te, sahuai laka khawtlang venhim mai bakah, huaisenna atânga huaisen leh chhawnna avânga mi lu lak kha a ni. Chutiang mite chu khawtlang zah an kai a, tlangval naran êl phak an ni ngai lo. Tin, Lal leh Upate pawhin ram chhuah leh ram mut thu hlaah pawh an thu an ngaichang thin. Nula in-a thut khawmnaah pawh tlangvalte'n an zah hle thin a, chutih rualin chung nula rima thut khawmnaah chuan tlangval hawihhawm lo leh nungchang mawi lo an awm ve chawk thin a, chutianga mit tikham an awm chuan mi lu leh sa lu la thin, mihrat khawkhengte chuan, "Kha'h, kiang rawh ka chhâwnin a hem ang che," an ti thin a ni. Hmanlai chuan Kel chal hmul leh latuak an chhum pawl thin a, chu chu mihuaisen, râ lu leh sa lu la theite'n an khim thin a ni. Chung mihuaisente chauh chuan he tawngkam, "Kiang rawh ka chhawnin a hem ang che," tih hi an hming thin.

Tûnah chuan kum zabi sawmhnih pakhatna kan chuang kai ta a, kan nun dan leh khawsak dan a danglam ta khawp mai. He tawngkam hian thangtharte hriat a hlawn tawh meuh lo pawh a ni thei e. A hriate pawhin tunlai atan chuan a pawimawhna a awm tawh lo kan ti mai thei bawk. Mahse he thu hi hmun hrang hranga Mizo zirlaite'n kan hriatreng turte zinga mi a ni. Hmun hrang hrangah Mizo thalaite chhan hrang hrang avangin kan inzâpharh a, kan hmalam hun atana kan inbuatsaihna kawngah hian he tawngkam hian kan rilruah hmun luah se tumruhna min pe thei a ni. Mizo thalaite hna nghet mumal nei lo thahnem tak kan awm a, hnathawhna awm chhunah lah chuan hnam

dangin an duh duhin min chawk let leh ta nghal a. Hotute'n, "I hun a tawp tawh," an tih ruala hna chawlh san ngaih chang a awm fo thin. Hmun tha leh hotu nihna hnamdangin an luah khat a, thenkhat erawh Mizo hming ti tha, chhuanawm tak tak an awm rualin a tam zawk chu hnam dang hnuaiah anmahni tihlawm loh hlau reng rengin hna kan thawk a, min hnuaiachhia a ni ber mai. "Eng nga tinge hnamdangin min hrual min hrual bik le?," tih hi Mizo thalaite'n kan inzawh makmawh a ni. Hnam dang hnuai a kan kûn fo na chhan chu an tumruh leh taihmakna avângin Mihuaisente Chhâwn (thiamna tak tak) an khim tlat vang a ni. Chu an chhawn khim hre reng chung chuan Mizote min sawp kual thin a ni. Chuvangin Mizo thalaite kan thangharh a ngai a, taima tak leh tumruh takin thiamna tak tak kan zir chhuah a ngai a ni. Mi lu leh sa lu lak vânga chhâwn leh diar tial khim ni lovin, taihmakna leh tumruhna avâng zawkin, Kel pa hmul leh latuak atânga siam ni lo, tunlai thiamna leh finna 'chhâwn' ngei hi khim kan tum tur a ni. Thiamna tak tak kan nei a nih ngat chuan hmanlai Lal leh Upate'n mi huaisen te thu an ngaichang ang khan mite'n kan thu an ngaichang ve dawn a ni.

Eng vangin nge mi huaisente khan tlangval naran te hnenah chutiang thu an chhak chhuah ngam? Chiang taka a chhanna lang nghal chu tlangval naran te khan chutiang thu sawi ve turin chhawn an la khim ve loh vânga ni. Chutiang chia chuan thiamna tak tak nei si lova kan inzir chhuak a nih chuan, thiamna tak tak neia zir chhuakte'n an thiamna chhâwn-in hmun hrang hranga hna kan thawhnaah te, a bik takin hna zawmnaa diriam takin min hem kiang sawk sawk mai dawn a ni.

Thiamna tak tak neih tum lem lova lehkha zir ve satliah hian awmzia a nei lo. Chuvângin Mizo thalaite tumruh leh taima takin thiamna tak tak (quality) neih tumin tan la ila, hnamdang te'n an duh duhin min hnuaiachhia tum mahse thiamna tak tak kan nei chuan mimal tinte hian khawi hmunah pawh, âw chhuah-a he thu sawi kher ngai lovin, kan thiamna chhâwn khim chu hmathehah hmangin 'Kiang rawh ka chhâwnin a hem ang che,' kan ti thei dawn a ni.

ADMISSION OPEN (3-3)

Zirlai zirna kawnga chaklo, zirlai tlemte duhtawka zirtirtu ten a an hrualna Northern Academy chuan High school leh Higher Secondary atan Admission a hawng mek e.

2024-2025 HLSC 100% pass.

**Northern Academy
8014163196**

Editor: Vanengmawia (7085878827); **Jt. Editors:** A. Lalfakzuala, Lalrotluangi Zote, , Henry VL Nghilhlova Zote
Manager: Lalremsanga Hnamte (8974845644); **Asst. Managers:** Zodingliana, Lalrinchhana, Lalrinawma
News Editors: Lalrintluanga, Lalrawntluanga, Andrew Lalmalsawma, Samuel R. Lalmangaiha, D. Lianmanga, Vanalremruatpuia Ralte
Circulation Managers: PB Lalhuapzauva, Samuel Lalhlupua, Hmingthanzuala, Vanlalrinkima, R. Zodinsanga, Zothankhuma, Lalrinchhana, K. Lalmuanpuia

ZIN & HAW

- Pu Lalremsanga, BECM chhiattawhna avanga Khawzawl zin chu a lo haw leh ta.
- PiZodinsangi te chhungkua N-Sec. chu a fanu boral vangin Khawzawl ah an zin.
- Tv. Lalremsanga s/o Laltanpuia, C-Sec. chu a hna thawhna hmun Ladakh atangin a lo haw.
- Pu Lalawmpuia Zote te chhungkua, V-Sec, Bangalore-a hnathawka awm chu chawlh hmangin an lo haw.
- Pu Lalthakima Colney, K-Sec. chu a hnathawhna hmun Darlawn lamah a kal leh ta.
- Pu Vanlalzawna te chhungkua, K-Sec. chu a pate a boral avangin East Phaileng ah an zin.
- Pu Lalthanfala Khiangte te chhungkua, N-Sec. chu chhiattawhna avangin Khawzawl ah an zin.
- Tv D. Liansanga, K-Sec. chu a hnathawhna hmun Sangau lamah a kal leh ta.
- Pu Lalrinmawia, V-Sec. chu chhiat tawhna thilah Hnahthialah a zin.

PAWL DANG

- **Civil Pensioner, Ramhlun North:** Kum 2026-2028 chhunga hruaitu turte: President: Pu Lalchhawsanga Vice President: Pu Zopara Secretary: Pu Biakthansanga Asst.Secy.: Pu H. Lalzarliana Treasury: Pu K. Lalruata Fin.Secy.: Pu RC Lalthangpuia
 - **Ramhlun North Cricket Academy:** Tripura a North East Little Master Trophy 2026 khelh turah Cricket Association of Mizoram Boy's Under 14 khel turin kan Academy zirlai, Benjamin Vanlalpeka s/o Lalbiakzuali C-Sec. leh Freddy R. Lalruatpuia s/o Henry Zosangliana C-Sec. te chu thlan an ni. An rual hian Lalmuanpuia s/o Robert Lalfamkima V-Sec. chu thlan a ni bawk.
- Assam a khelh tur North East Rising Cup 2026 a Cricket Association of Mizoram Girl's Under 15 aiawh turin kan Academy zirlai Vanlalnunpuii d/o Lalthanhimi N-Sec. chu thlan a ni bawk. Kan veng naupang Mizoram aiawh tur te kan chhuang a, hlawhtlinna rawn chang ngei turin duhsakna kan hlan e.

CENTRAL YMA THU

- March 28 - April 3, 2026 chhunga Central YMA hnuai Ruihhlo Do Pawl, Central Anti Drugs Squad (CADS) ten ruihhlo leh a kaihhnawih thahnem tak an man a, heng zingah hian No 4 (Hawng) 13 leh No 4 (tictac) bur 53 man a ni. Ruihhlo kaihhnawih ah hian mihring 35 man niin heng atang hian Excise & Narcotic Deptt ah mi 2 pek an ni.

LEI PIAH LAMAH

Rochungnunga, K-84 h/o Khawlhniangi, T-Sec. chu 29.3.2026 dar 10:45 AM khan boralin lumen a ni a, a tuk ni 30.3.2026 chhun dar 12:00 ah Ramhlun North Thlanmual, Zemabawk ah vuiliam a ni.



Lalfala, K-85 h/o Ramengmawii, K-Sec. chu ni 4.4.2025 dar 12:30 AM khan a boral a, hemi ni vek dar 1:00 PM ah Ramhlun North Thlanmual, Zemabawk ah vuiliam a ni.



Lusun khawhar chhungte thlamuantu Pathianin vengin awmpui zel che u rawh se.

DAMLO

- Pu Hualhima, T-Sec. chu Synod Hospital, Durtlang ICU ah enkawl mek a ni.
- Dr. C. Lalzarliana, N-Sec. chu Synod Hospital, Durtlang a awm chu dam takin a lo chhuak leh ta.
- Laldinliana s/o Lalrohluia, C-Sec. chu Synod Hospital, Durtlang ah a ruh zai a ni.
- Pu Chalhmingthanga C. Sec Synod Hospital, Durtlang ah enkawl mek a ni.

THILDANG

- **Insawn:** Pu B. Zonunmawia s/o B. Lalchuanasanga T-Sec. te chu Pu Thanchunga (Fam) N-Sec. te in ah an insawn.

LOCAL COUNCIL

- Vengchhungah Septic Tank leak hmuh leh hriat tur a la awm fo mai a, chhungtin te'n mahni Septic tank pipe te lo enfel nise, midang tana harsatna thlen lo turin kan in hriattir a ni. Hetia hriattima chhuah hnu pawh a la ngaihsak lo kan awm chuan an chungah action lak a ni tawh ang.

Tin, kawngpuia tui chhe paihna luanitir mai mai hmuh tur a la awm fo mai. Hengte hian kawngpuia a tichhe duh a, lo siam tha vat turin kan inhriattir bawk a ni.

BLOSSOM ATELIER PRE SCHOOL & DAY CARE

Naupang kum 2-5 inkar tana zirna in hmun him leh nuam. Play area changtlung tak awmna hmun ah, kum 2026 session atan ADMISSION a tih theih e. Pre School experience kum tam tak nei enkawl na hnuai ah in fate hmangaih leh duat takin, zirna tha nen kan lo enkawl sak ang che u.

School uniform T-Shirt a thlawn in an dawng bawng ang.

Learn, Play and Grow with us

Contact-7630079091 (3-3)

Location- Zarkawt Greyhound Building

LAWMAWM

- Lalrinpuii d/o Lalchhuanawma (Fam) N-Sec. leh CB Lalroliana, te chu Dt. 25:03:2025 khan Presbyterian Biakin, Hunthar Vengah an innei.
- Lalduhawmi Bowman d/o Er. Bowman Khenglawt T-Sec. leh Joseph Lalrinhlua, Ramhlun South te chu Dt. 31:03:2026 khan Presbyterian Kohhran, Ramhlun South ah an innei.
- Pu Lalremruata leh Lalthazuali te nupa, C-Sec. te chuan ni 27.3.2026 khan ZMC&H ah fapa an nei.
- Pu Benjamin Lalngakliana leh K. Vanzampuii te nupa, V-Sec. te chuan ni 29.3.2026 khan Civil Hospital, Aizawl ah fapa an nei.
- Pu Amit leh Lalremliani, V-Sec. te chuan ni 30.3.2026 khan Synod Hospital, Durtlang ah fapa an nei
- Pu Lalmuanpuia leh Ethni Darthangpuii, C-Sec. te chuan LRM Hospital-ah fapa an nei.

KOHRAN

- **Presbyterian Kohhran, Ramhlun North:** Ni 2.4.2026 (Ningani) zan khan 'Zan Ven Inkhawm' neih a ni a, Zirtawpni nilengin inkhawm neih a ni bawk.

Easter Sunday-ah KTP kaihhruiainain Sunrise Service neih a ni ang. Tin, Ni 6.4.2026 (Thawhtanni) zan atangin KTP ten Sports an tan dawn bawk a ni.

- **Presbyterian Kohhran, Ramhlun East:** Ningani zan khan 'Zan Ven Inkhawm' neiin Sacrament buatsaih a ni a, zirtawpni nilengin inkhawm an nei bawk.

KTP kaihhruiainain naktuk Pathianni (Easter Sunday) ah Sunrise Service neih a ni ang.

Ni 6.4.2026 (Thawhtanni) zan ah KTP ten Sports hawna hun an hmang ang.

- **Baptist Kohhran:** Salvation Army : 2nd-5th, April chhungin Good Friday & Easter pual Crusade neih a ni a, Capt. Joseph Rozamlia, Commanding Officer chu Speaker a ni.

- **Roman Catholic:** April 2 khan Maundy Thursday zan (Zirtir te Kesil & Venpui zan) Biakin ah Mass inthawina ah Puithiam in Kesil na hun a nei hnuah BEC hrang hrang te kaihhrui chhawk turin Venpui na program a awm a. Confessions, inremlehna sacrament a awm bawk. April 3, Good Friday ah Ramhlun South atangin Kohhran kawngzawh neih a ni a, Ramhlun area, Bawngkawn area, Ziangtui leh Zemabawk area te huamin hemi zawh ah Biakin puiah High Mass, Bung thumah then in, serh leh sang chhawng hrang hrang nen a Mass hlan a ni. April 4, Holy Saturday/Easter Vigil zan ah Kohhran inkhawm an nei a, hemi zan hian Baptism channa hun Mass inthawina neih a ni. April 5. Easter Ni hian zing lamah Easter Mass a awm a, confirmation dawn turte hi Bishop kaltlangin hun hawn a ni. Easter celebration hi chawhnu lamah CTP, thalai lam te kaihhrui nain program hman a ni dawn a. Tlai dar 3:30 atangin Easter Ruai buatsaih a ni bawng ang.

BADMINTON PART-1

- KT Khuma, N-Sec.

Cock vaw tura sawmna ka dawng zet kha chu aw, phurna namen lo leh chakna khan min tuam hneh ngei mai. Khami tuma ka kalpui thiante kha an kum zah leh an in ban zat pawh sawi dawn ila ka la sawi thei chiang a lawm.

Tichuan, ka unaupa racket (arbawm chhin ni lo) ka va hawh sak a, a wawi khat nan racket chu ka ta ang maiin ka hum ve ta. Ka phur lutuk kha kangvar feh haw chhawl hal tui in chak ang mai te hian ka intehkhin vel nia maw le.

Tin, heti hi a ni a, Bawngkawn a cock zawrhna dawrah chuan cock man tlawm ber chi panga lai ka lei a, a bawm ruak a awm, i duh em a ti a dawr nghaktupa chuan, a ngai lo, polythene a awm chuan a taw e tiin ka kut veilam chuan ka khai var va va a.

Ngaihuahna zawng zawng kha Durtlang hall chhungah a awm vek tawh a, Sanghar ar la tlan chhia an sawi ang maiin a chak thei ang berin hall panin ka tlan chho a, hall ka han thleng cho zet kha chu aw, min hmu a piang kha an nui tet tet zel a, eng nge maw an nuih chu aw ka ti a, kei lah chuan ka cock var khai kha, inrinni tuk vawksa khaiin ka la khai kual ta deuh deuh a. Chutah zet chuan ka hrethiam ve ta.

Mi fate chuan a bawm dik tak chhungah cock dahin, an hman tawk an lo phawrh chhuak mai thin a ni a, racket pawh a bawm dik takah ak in mawi hnai takin an lo che thlap a, kei ka racket hawh ber kher kha a bawm a awm tawh lo va. Scooter hnungah ka tawn bet a, ka kekawr bul neih zinga a chhing ber ha chhuakin ka sneaker hlui pawr chhap tawh, kum khat zet bun tawh loh, khawih chet zawng pawha, khu laih laih thei tawh chu ka vaw fai nawk nawk a, ka bun ve mai bawk a. Ka vanneihna em em chu, Cock vuak hi ka thiam zawng tak a nih beiseina ka nei lian ve hrim hrim kha a ni.

Ka phur lutuk ber mai kha aw, chhun chaw fak na chang reng reng hre lo khawpin, Hall ka han thleng chho kha a ni a, tichuan le, ka inkhel ve ta ngei a, ka hneh ngei tura ka rin te'n a min han sawisa tak tak mai chu ka hah lutuk kha a mangan thlak tak zet a ni. Dang hi a ro huam huam a, Sakhi luite tui chak a thaw huam huam te kha ka intehkhin ber a, a ni ka dang kha a ro tak zet a ni. Chutah ka hah lutuk kha, a peih hian ka peih tawh lo hrim hrim, thlan tui nen mittui nen khawlum nen, engmah sawi peih lovin ka khelhpuipa chu hall pawnah ka chhuahsan tawp a, zing thophang ang maiin ka chau lutuk kha ka melh ngai kha ka melh ngawr ngawr a, a hahthlak tak zet a ni.

Tin, pawna ka thut hahdam deuh hnu chuan, ka chhun chaw ei loh a rawn lang ta, ka tamchhaw chu a ni ta der mai. Thingpui dawr ka zawng kual a, vanneithlak takin Mizo thingpui dawr a bang dap, a chhut pawh lei chhut rual, an tui dehna pawh rangva chhut mar, tuiek tan tawh ka va hmu hlauh a, an ei tur siam kha a tuiin a man a lo tlawm nasa mai a. Ka pawisa neih chhun chuan ka va inhnawh puar a, ka mit meng pawh a dik ta deuh a, ka hahdam huai mai.

Aw le, eng thil pawh ni se, eng kawngah pawh ni se la, thil reng reng hi kan zuam ang leh, kan beisei ang hi a lo ni dawn lo a ni tih hi, ka rin ngheh phah ta chiang khawp mai.

HINDI TUITION (RAMHLUN NORTH)

Class 1 atanga Class 8 zirlai te tan Hindi Class kalpui a ni a. School syllabus chauh ni lo, an tana pawimawh tur dangte pawh kan zirtir tel bawk e.

(Class Timing):

3:30 PM – 5:00 PM

7:30 PM – 9:00 PM

(Monthly Fee): ₹ 2,000/-

(Phone): 8787631852 (Call/WhatsApp)

Location: Near Holy Child School, Ramhlun North.

ADVERTISEMENT**KC TUI**

Tui thianghlim tak PHE a quality test thlap, PickUp-in 2,000 litre kan pe thei reng e. Ramhlun North veng chhung tan discount kan pe e.

Ph: 9774223462 / 7005010327

(10-2)

HRIATTIRNA

Pi Maria Lianvungi d/o V. Thuamzaliana hian a LSC No. 1839 of 2011, Chawlhmun Veng ami chu tibova rawn insawiin of- fice-ah Re-issue a rawn dil a. A dil anga tihsak a rem lohna chhan engpawh hria chuan chanchinbu a chhuah atanga ni 30 ral hma ngeiin a hnuai address zia ah hian hriattir tur a ni. Hetiang a LSC thar pek chhuah leh a lo nih chuan LSC hmasa chu cancel nghal a ni ang.

Sd/- Assistant Commissioner (Revenue)

Aizawl District: Aizawl South

(1-1)

Beraw Enterprise

Authorised Distributor For

Sunflame
KitchenwareHAVELLS
LIGHTINGairtel
Payment Bank**GRAND
OPENING**Opening on 11th April

DISCOUNT UP TO

30%
OFF

B-51, Industry Peng, Ramhlun North

8730803661 / 8800875278**HOLY CHILD SCHOOL, RAMHLUN NORTH****OPEN ADMISSION FOR 2026-2027 (7-4)**

- Kum 2026-2027 session atan Holy Child School chuan Nursery to Class - X lut turte tan Admission a hawng leh ta a, lo ngaihvun ve rawh le...
- Hmangaihna leh hriattiamna thuk tak nen a naupang te hmasawn nghal tura enkawlina hmun tur a ni e.
- Hre chiang duh tan a hnuai a phone number tarlan ah hian a zawhfiah theih reng e.



+919436154080

holychildschool143@gmail.com